

# Mein lieber Schwan

Letzt Woch, onn so emm scheene Septemberdaach, hawwe moin Stommdischbruder Schorsch und ich unne omm Moo uffere Bonk gesotze unn hawwe in die Luft unn iwwers Wasser geguckt. Driwwe, noh beim onnern Ufer, warn zwaa Schwän uffem Wasser, die bald gonz longsom uff unser Seit unn uff uns zu geschwumme sinn.

Doo sächt de Schorsch: So Schwän sinn doch komische Veechel.

Ich habben oogeguckt unn gefroocht: Warum sinn dess komische Veechel?

Doo moont der Schorsch: Ja weil dess sinn doch Wildveechel, unn trotzdem sinnse immer gonz noh bei de Mensche, wie die doodriwwe – kaum hawwe se uns gesehe unn schunn kumme se eriwwer.

No ja, saach ich, die moone halt die dete von uns gefittert wern. Dess konnsde doch immer widder seh, dass monche Leit dene Schwän was vor de Schnawwel werfe.

Die Schwän warn jetzt schunn in de Mitt vom Moo. Ess sinn joo scheene Veechel, mett ihm lange Hals, ihm runde Kopp, ihm rote Schnawwel mettem schwarze Höcker unn mett ihrne weiße Feddern, die ohne Oostrengung iwwers Wasser gleite.

Ich frooch de Schorsch; Was frisst so enn Schwon eichtlich, waaßt du dess? Der frisst doch koo Fisch, odder?

De Schorsch druff: Wenner ooner kriehe kann, dann ja. Awwer sunnst steckder soin Kopp unner Wasser unn holt sich Wasserplonze eraus, doodeferr hotter joo soin lange Hals, unn wenner onn Lond iss, dann frissder aach vom Gras unn von dem was dezwisehe wächst. Guck, doo sinnse!

Die zwaa Schwän warn jetz gonz noh unn hawwe zu uns hergeguckt, als wollde se uns frooche: No, gibt's bei eich was ze futtern?

De Schorsch hott gerufe: Von uns krieder nix, awwer mir redde grad iwwer eich.

Die zwaa Schwän hawwe stolz ihrn Kopp gehowwe unn sinn gonz longsom omm Ufer entlong unn geeche de Strom fortgeschwumme, unn widder ohne Oostrengung unn nor mettere gonz kloone Well vor ihrne Bust.

Ja, die Veechel, sächt de Schorsch, so große wie die Schwän die wern iwwerlewe, awwer die kloone, doo habb ich moi Bedenke. Ess gibt immer mehr Viecher, die Vocheleier fresse, jetz kumme aach schunn Eichhörncher in die Vorgärten, die sich doodroo beteiliche unn desdeweche ... guck, jetz fliehn se fort.

Mett emm mords Geplatscher sinn die zwaa Schwän e Stick weit iwwers Wasser gelaafe bevor se genuch Tempo hadde ferr hochzekumme, dann hawwe se gedreht, sinn onn uns vorbei gefloochte unn mir hawwe dess Wummern von ihrne Flitch geheert.

De Schorsch hottene noochgeguckt unn dann gesaat: Schwän sinn doch Veechel, die meisdens uffem Wasser lewe, odder?

Ja, saach ich, warum?

Grinst de Schorsch: Doo isses joo gut. Weil wenn die Schwän wie die Schwalwe de gonz Daach iwwer Flerschem flieche dete, weilse Micke fonge missde, doo hätte merr schwer druff Owacht se gewwe dass uns kooner von dene uff de Kopp fällt.

Um Gottes Wille, saach ich, vor lauter Gucke nooch dene hätte mir nooch e paar John aach so lange Häls wie die Schwän.

Mein liewer Schwan, hott de Schorsch gesaat, Honnes, mach enn lange Hals, doo hinne kimmt e Fluchzeuch.

Eiern Honnes